

瑜伽師地論卷第六十八

彌勒菩薩說

唐三藏沙門玄奘奉詔譯

攝決擇分中聲聞地之二

問諸行寂滅是滅諦耶。設是滅諦諸行寂滅耶。答若  
是滅諦亦諸行寂滅。或諸行寂滅然非滅諦。謂由無  
常滅故。非擇滅故。諸行寂滅。問何等法滅故。名滅諦  
耶。答略有二種。一煩惱滅故。二依滅故。煩惱滅故。得  
有餘依滅諦。依滅故。得無餘依滅諦。問若此滅諦先  
無後有。云何是常。若常時有。何不一切有情於一切

時般涅槃耶。答。不流轉相。不現行相。是滅諦相。此諦云何先無後有。又無生相。無滅相。是常相。滅諦亦爾。是故名常。若有證得一切麤重永息滅者。彼般涅槃。若未證得者。彼不般涅槃。有滅諦故。諸有情類有證得者。是故涅槃。是證所顯。非生所顯。復次。若有遠離四種過失。說滅諦者。是名正說。何等名爲四種過失。一。增益過失。二。自相邪分別過失。三。相雜亂過失。四。損減過失。若言諸行盡滅。有異者。是增益過失。言無異者。是自相邪分別過失。言亦有異亦無異者。是相雜亂過失。言非有異非無異者。是損減過失。

問。若唯一切出世間五非取蘊。皆道諦攝。何因緣故。唯說正見爲先。八聖支道而爲道諦。答。依三學故作如是說。由有學者。於時時間依增上戒學而起修學。於時時間依增上慧學而起修學。又此八聖支道。三蘊所攝。是故唯此說名道諦。問。何因緣故。正語。正業。正命。說爲戒蘊。答。二因緣故。一。依正受用法故。二。依正受用財故。謂正語。正業。戒爲根本。戒爲所依。方能受用一切正法。是故說名依受用法。由正命故。不依矯詐等起邪命。法求衣服等。此爲根本。此爲依處。正受用財。是故說名

依受用財。又於是處世尊說爲增上清淨意現行性。此中依止貪等起犯戒思。依止矯詐等起邪追求衣服等思。若離此事。應知是名增上清淨意現行性。問何因緣故。正見正思惟正精進。說爲慧蘊。答。由此慧蘊略有三種作業。因此三法方得究竟。謂通達諸法眞義。是初業。通達諸法眞義已。卽於眞義爲他宣說。施設建立。分別開示。令其易了。是第二業。爲斷餘結法隨法行。是第三業。如是三業。由正見正思惟正精進故。如其次第而得究竟。問何因緣故。正念正定。說爲定蘊。答。二因緣故。一由自性故。二由所依故。由自

性者。謂三摩地。由所依者。四因緣故。念於此定能作所依。一繫所緣故。謂於四念住繫攝其心。二隨順定。故謂由此念於守護根門。正知而住。順歡喜處。隨念作意中能隨順定。三能斷蓋故。謂於各別不淨觀等。諸蓋對治作意中能斷諸蓋。四極多修習相作意故。謂遠離者。於止舉捨相無間殷重加行中能多修習。是故此念爲定所依。復次正見差別。略有十一。謂如病見如癱見。乃至無我見。結見。離繫見。能離結見。於四種行如其次第。有四種見。謂於諸煩惱纏俱行行中。於煩惱隨眠俱行行中。於愛味俱行行中。於過患

俱行行中。次第觀爲如病如癱如箭如障。若於諸行觀爲生滅名無常見。觀爲三苦之所隨逐名爲苦見。觀彼遠離餘我我所名爲空見。觀彼諸行體性非我及我所相名無我見。如是八種是緣苦諦正見。若於集諦觀爲因集生緣名爲結見。由彼集諦於苦諦中起雜染結故。若於滅諦觀滅靜妙離名離繫見。由彼滅諦一切煩惱及依離繫所顯故。若於道諦觀道如行出名能離結見。由彼道諦究竟能離結縛所顯故。問。若先起無常苦空無我見。後方起如病如癱如箭如障見。何緣此中先說如病等見。答。此中依已得道

補特伽羅說彼爲先。何以故。已得聖道諸有學者。由增上意樂。於諸取蘊觀爲如病。乃至如障。如是觀已。爲斷餘結。復起上位清淨無常見。乃至無我見。當知此中略有二種無常等見。一是如病等見。所依不清淨見。以此爲先。此爲引導。爲欲獲得所未得故。二是如病等見。能依清淨見。已得如病等見。復令增長。及爲得心善解脫故。如是十一正見中。空行無我行見。名爲空行。餘行見名無願行。一行見名無相行。謂於滅諦離繫行見。復次於修道中。一切出世間道緣四諦爲境。當知皆能對治三界一切煩惱。何以故。由諸

有學已見迹者。先由法智類智於現不現一切行中起現觀已。後於修道攝一切行總爲一團一分一聚以無常等行次第觀察而不分別。此是欲行此是色行此無色行。此是現見此非現見。是故當知於修道中諸出世道所攝聖道能總對治下地上地一切煩惱。復次彼諸聖者於修道中由出世道而升進時。多分以無相行數數作意思惟無相。何以故。由此作意最能引發現法樂住斷煩惱故。復次五神通無諍願智無礙解等。及諸如來力無畏等。所有一切不共佛法。皆是道後所得其性清淨道所建立。由此因緣皆

道諦攝。

問。一切四諦皆應徧知。何緣但說苦諦是應徧知。答。由於苦諦以二種相應徧知故。所謂自相及與其相。於所餘諦但知自相。謂以因等行知集諦自相。以滅等行知滅諦自相。以道等行知道諦自相。是故唯說苦諦是應徧知。問。苦諦亦應永斷。何緣唯說集諦是應永斷。答。由集諦永斷能顯苦諦永斷。是故唯說集諦是應永斷。

復次於諸諦中略有二種現觀。一智現觀。二斷現觀。智現觀者謂隨次第於諸諦中別相智生。斷現觀者

謂隨次第無倒智生爲依止故證得所有煩惱斷滅。復次略有五種發起正精進因緣。一宣說正法。二修行共住。三察懈怠過失見精進功德。四由思擇力相續成熟。五知所證得前後差別。

復次略有二種於斷作證。一於種子伏斷作證。二於種子永斷作證。當知離繫亦有二種。一於諸煩惱品別離繫。二於煩惱事相屬離繫。

問。如世尊言汝等苾芻勿行諂誑。此中如來觀見諂曲幾種過患。誠諸苾芻不令行諂。答。觀諂曲者有十二過患故。一諂曲因緣不能證得真實智慧。二退失

名譽。三退失他信。四退失功德增長。五退失於智者邊聽聞正法教誡教授。六諸惡增長。七令心相續遠離諸善。八由諂曲不平損害其心常懷苦惱不安隱住。九慮後苦法。十非聖法器。十一臨終追悔。十二身壞已後墮諸惡趣。生那落迦。復次欲界中諂曲有八種行。及七種事。云何八行。一迷惑諂行。二覆藏諂行。三顯示諂行。四結構諂行。五恭順諂行。六謀計諂行。七推注諂行。八現悲諂行。云何七事。一言說事。二詰問事。三違諍事。四現親友事。五現委信事。六所作假託事。七艱辛事。由初事故。其諂曲者與諸世間隨起言說。

於非義中示現爲義以相迷惑。或於義中示現非義。如於義非義於有非有。當知亦爾。又於現行諂曲所起諸惡行中。若他詰問。諂者則便覆藏實罪。顯不實德。又諍論者將欲推其功德過失。爾時諂者則便結構諸惡朋黨。又諂曲者見諍論人有力暴惡。心生怖懼。卽以卑下身語。二業隨順恭敬。現親友相。又諂曲者若見輒直。可規其利。內與不可委信者等。而外現已極可委信。謂行住中虛詐積集清善之相。又諂曲者於諸親善得意。友朋未來。廣大所作事中。先詐爲伴。後所作事。現在前時。矯現種種方便。推注。謂爲遮

防自劬勞故。又諂曲者隨遭一種苦惱事。已於彼怨對所遭苦事實無如是。重憂重苦。然自顯示有重憂苦。謂深歎恨愁憂苦惱。乃至悶絕。

復次麤語聲聞。尚不應得於諸諦中。教誡教授。況當能得真諦現觀。或復清淨。又有九種麤語聲聞。麤語之相。若有成就如是相者。當知此名不可與語。麤語聲聞。何等爲九。謂能舉罪補特伽羅。正詰問時。以不美言假合而答。或不相應。或不圓滿。或託餘事方便而答。是名初相。又以謬言假設餘論。方便推遣所詰問事。是第二相。又瞋恚纏擾。亂憎憤。渾濁自心。是第

三相。又瞋恚纏發起憤怨。嘗言鄙語。是第四相。又起高心。彼既說我。我當何故。而不說彼。是第五相。又堅覆藏。自所作罪。是第六相。又結怨心。相續不捨。是第七相。又多發起報怨之心。是第八相。又他顯說。能舉罪者。若實不實。諸功德時。不生信解。非撥毀罵。是第九相。此中略有二種。舉罪補特伽羅。一共所尊重。二非共尊重。當知此中初二種相。依初能舉補特伽羅。餘七種相。依第二能舉補特伽羅。復次本地分中。依戒律儀諸毗奈耶相應之相。今當決擇。噯柁南曰。

攝制立戶羅。無逸障學觀。依攝受受用。甚深說喻事。

略有七處。攝毗奈耶及別解脫。何等為七。一教勅。二開聽。三制止。四犯處。五有犯。六無犯。七出罪。云何教勅。謂佛世尊毗奈耶中。勅諸苾芻。捨不善法。增長善法。當知是名略說。一切教勅之相。若廣分別。無量無邊。云何開聽。謂佛世尊毗奈耶中。開許一切能無染汙。現所受用資生因緣。云何制止。謂佛世尊毗奈耶中。制止一切自性罪法。違無罪法。云何犯處。略有十八。一不善。二違善。三身業。四語業。五意業。六戒壞。七

見壞。八軌則壞。九正命壞。十隨護他心。十一護他損惱。十二護非處疑慮。十三姪。十四鉢。十五衣。十六食。十七臥具。十八病緣醫藥及餘資具。不善者謂所有性罪。違善者謂所有遮罪。身語意業處隨其所應於一切五犯聚中當知其相。如是所餘犯處亦於五犯聚中如其所應當知其相。云何有犯。謂若略說有五犯聚。何故於此五犯聚中起諸違犯。謂五因故。一因緣故。二發起故。三事故。四方便故。五究竟故。此分別義。於攝事分毗柰耶摩怛理迦中我當廣說。復有九種犯。一近事男犯。二近事女犯。三勤策男犯。四勤策

女犯。五正學犯。六苾芻尼犯。七苾芻犯。八異生犯。九有學犯。無有無學犯。何以故。由彼更無所應作故。法爾獲得小及隨小一切學處悉皆止息。又定不能犯染汙罪。云何無犯。略有四種。一初業。二顛狂。三心亂。四苦受所逼。云何出罪。略由五相。一由自故。二由他故。三由自他故。四依轉故。五依捨故。由自故者。謂應自靜息故。由他故者。謂見諦者有所違犯不染汙罪。由自他者。謂諸異生染不染罪。依轉故者。謂轉捨苾芻依轉得苾芻尼依。或轉捨苾芻尼依轉得苾芻尼依。爾時苾芻苾芻尼各所犯罪。或轉餘形。或轉無形。依

捨故者謂命終已。

復次略有十種制立學處清淨。一道理清淨。二果清淨。三攝受清淨。四外清淨。五內清淨。六具分清淨。七愛敬清淨。八伏對治修清淨。九隨眠斷對治修清淨。十相續不斷清淨。復有差別。謂有因緣制立學處清淨。遠離受用欲樂。邊清淨。遠離受用自苦。邊清淨。勝行清淨。勝命清淨。同法共住清淨。無違諍清淨。制伏煩惱清淨。煩惱繫清淨。任持正法清淨。

復次略有十種尸羅過失。一毀壞所學過失。二不喜樂過失。三伴相違過失。四期願過失。五放逸過失。六

增上慢過失。七隨眠不清淨過失。八意樂不清淨過失。九不出離過失。十邪禁過失。復有十種尸羅功德。一和合尸羅。二無間尸羅。三無怨對尸羅。四無損害尸羅。五堅固尸羅。六出離尸羅。七勝所治尸羅。八不退轉尸羅。九不共尸羅。十無上尸羅。

復次於毗奈耶勤學苾芻依於十時。應不放逸。何等爲十。一依犯時。二依定時。三依正時。四依乞食時。五依所作時。六依受用利養恭敬時。七依求多聞時。八依思正法時。九依遠離時。十依思通達究竟時。云何於毗奈耶勤學苾芻依犯初時。應不放逸。謂有苾芻

成就五支所攝不放逸。卽前際俱行等如前廣說。如是名爲於毗柰耶勤學。苾芻於初時中修不放逸。云何於毗柰耶勤學。苾芻依定第二時應不放逸。謂有苾芻或住空閑。或居樹下。生貪欲蓋。乃至疑蓋。終不安忍。則便棄捨。除遣變吐。彼由五蓋能染汙心。乃至能令不得涅槃。爲欲斷故。於時時間應修止相。於時時間應修舉相。於時時間應修捨相。彼於如是止舉捨相得善巧已。由下劣心慮。恐下劣便正修舉。由掉舉心慮。恐掉舉便修內止。心得平等。便修上捨。又於已得三摩地中。不生愛味。不起顧戀。無有貪染。無著

而住。如是名爲於毗柰耶勤學。苾芻第二時中修不放逸。云何於毗柰耶勤學。苾芻依正第三時中應不放逸。謂有苾芻臨命終時。其心猛利。發起如是正加行心。謂我今者應以緣佛緣法緣僧正念而死。應以緣善善心而死。彼遂發起如是如是善守護心正念。現前以緣於佛法僧正念及緣諸善善心而死。彼由緣佛緣法緣僧所有正念及由緣善所有善心而命終故。名賢善死。賢善天沒。亦名賢善趣於後世。如是名爲於毗柰耶勤學。苾芻第三時中修不放逸。云何於毗柰耶勤學。苾芻依於乞食第四時中應不放逸。

謂有苾芻依於村邑聚落而住。彼卽於此村邑聚落廣說如乞食清淨經。如是名爲於毗柰耶勤學。苾芻第四時中修不放逸。云何於毗柰耶勤學。苾芻依於所作第五時中應不放逸。謂有苾芻於鉢作業。於衣作業。於諸智者同梵行所看侍作業。或復於餘所有作業。皆無縱逸。無縱逸故。不焦不爛。不失不壞。亦不零落。不過所作。不鄙所作。不惡所作。不急所作。不緩所作。不掉所作。不染所作。隨順世間順毗柰耶所有軌則。如是名爲於毗柰耶勤學。苾芻第五時中修不放逸。云何於毗柰耶勤學。苾芻依受用利養恭敬第

六時中應不放逸。謂有苾芻隨所獲得利養恭敬於所獲得不染不著不耽不湏不悶不執。亦不保玩而受用之。深見過患。善知出離。而受用之。隨其所得利養恭敬。能自制伏。不因所得利養恭敬心住。憍傲。如是名爲於毗柰耶勤學。苾芻第六時中修不放逸。云何於毗柰耶勤學。苾芻依求多聞。第七時中應不放逸。謂有苾芻棄捨世間所有諷誦綺飾詞論。絢藻文章。隨順世間相應多聞。於佛所說所有甚深相似甚深空性相應緣性緣起。若順若逆。一切經典恭敬受持。令得究竟。非觀諸法存有所得。所獲勝利名得究

竟非觀諸法免脫論難所獲勝利名得究竟非爲利養非爲恭敬乃至但爲自得調伏自得寂靜自得涅槃自得沙門若婆羅門最上義利故於此法善聽善受讀誦通利純熟究竟如是名爲於毗柰耶勤學苾芻第七時中修不放逸云何於毗柰耶勤學苾芻依思正法第八時中應不放逸謂有苾芻獨處空閑如其所聞如其所受如其所得所有諸法思惟其義稱量觀察思所應思離不應思於其少分但生信解於其少分以慧觀察凡所思惟但依於義不依於文如實了知黑說大說堅固思惟審諦思惟相續思惟隨

所思惟要當究竟於其中間終無退屈如是名爲於毗柰耶勤學苾芻第八時中修不放逸云何於毗柰耶勤學苾芻依於遠離第九時中應不放逸謂有苾芻不與在家及出家眾共相雜住不同其喜不同其憂廣說乃至於所生起世事業中終不許其究竟隨轉處空閑林邊際臥具遠離一切有情方邑散亂懈怠及障止觀諸隨煩惱如是名爲於毗柰耶勤學苾芻第九時中修不放逸云何於毗柰耶勤學苾芻依通達究竟第十時中應不放逸謂有苾芻於有如實知有於非有如實知非有於有上如實知有上於無

上如實知無上。由彼於有非有有上無上如實知故。於所未得不生得想於所未證不生證想離增上慢非增上慢所攝持故自記所解如是名爲於毗柰耶勤學苾芻第十時中修不放逸。

復次有四種障能障出家。謂意樂障。所依障。業障。不自在障。意樂障者。謂或爲王威所逼迫而求出家如是等。所依障者。謂或盲聾或扇搥迦或半擇迦或爲疥癩禿鬘等種種惡疾。逼切其身如是等。業障者。謂害母等諸重惡業。不自在障者。謂父母等所不聽許。若諸僮僕若王大臣。他所劫掠。若蘭所得。若有辯

答如是等。

復次略有五處。諸出家者於毗柰耶決定應學。何等爲五。謂應學知有犯無犯。若重若輕及略所說別解脫經。有犯無犯如前已說。由六種差別所犯成重。一。制立差別。謂於學處而制立故。二。事差別。謂雖同是波逸底迦。然殺生等所有性罪。於餘遮罪有差別故。三。穿穴差別。謂如有一數數犯故。四。煩惱差別。謂如有一用其猛利貪瞋癡纏而毀犯故。五。智差別。謂如有一善品微少。智慧狹劣。雖等建立等事等穿等煩惱起。然其所犯成極重障。非此相違有所犯者。如小

水流少草能偃於彼細草不能漂沒。如大水流聚積草木亦不能偃。此中道理當知亦爾。六時差別。謂如有一於其所犯不能速疾如法悔除。長時習已然後對治。與此相違。應知所犯名爲輕罪。

復次諸持律者應以五相觀察所犯然後斷罪。何等爲五。謂一向雜染故。一向不行故。制立依處故。現彼過失生不生故。非一向現行故。此中一向雜染所犯。謂諸性罪。應當一向教令不犯。若毀犯者。如其所應當爲顯示令速悔除。又佛世尊依此補特伽羅。此方此時制立如是遮罪學處。若有所餘補特伽羅餘方

餘時犯此過失。由觀此失而制立故。如其所犯應爲顯示對治之法。若有不犯如是過失。不應於此斷其有犯。亦不應顯對治之法。如是名爲總略宣說觀察所犯。

復次於毗柰耶勤學苾芻依止七處於六處中應修加行。云何依止七處於六處中應修加行。謂依止大師依止親教依止軌範依止衣服依止乞食依止臥具依止病緣醫藥什物於法於學教授教誡等持俱養不放逸中應修加行。此中法者謂別解脫經及廣分別學者謂增上戒學增上心學增上慧學教授教

誠者謂依增上戒學教授教誡依增上心學教授教誡依增上慧學教授教誡等持者謂九次第定供養者謂財供養及法供養財供養者謂由一種可愛樂法法供養者謂由所餘不放逸者謂於五種善巧相續無間勤修加行謂蘊善巧乃至處非處善巧

復次毗柰耶中有五種攝受一屬已受二承受受三委寄受四捨施受五爲他受由二因緣令屬已受不得清淨一生染著故二擬蓄積故與此相違乃得清淨由二因緣令承受不得清淨一非處受故二非量非法受故與此相違乃得清淨由二因緣令委寄

受不得清淨一不觀察人而委寄故二於不淨物心繫著故與此相違乃得清淨由二因緣令捨施受不得清淨一於鄙惡田而捨施故二非無希望而捨施故除三種田當知所餘名鄙惡田謂功德田悲田恩田與此相違乃得清淨由二因緣令爲他受不得清淨一非宿交又不告白及性不識故二有染心故與此相違乃得清淨

復次毗柰耶中由五因緣所受用事不得清淨一性有罪故二不端嚴故三不任用故四非攝屬故五不作淨故性有罪者謂依僞斗僞稱僞函繫縛撾打若

斫若殺及搶撮等所獲財物而受用之名不清淨。不  
端嚴者謂受田宅及諸賄貨象馬牛羊雞狗犬大  
男大女小男小女奴婢作使金銀珍寶及生穀等而  
受用之名不清淨。不任用者謂大小便利洩唾所汗  
膿血肪膏此等塗染復有所餘如是等類若受用者  
名不清淨。如世尊言便利等器皆不清淨不應受用  
非攝屬者謂或僧祇物若不被差不墮鉢中亦不屬  
鉢。或別人物不與不捨亦不捐棄非處委信亦復非  
量而受用之名不清淨。不作淨者謂五種淨何等爲  
五。一受得淨。二捐壞淨。三委寄淨。四時法淨。五捨分

別淨。與此相違所有受用名爲清淨。

瑜伽師地論卷第六十八

音釋

扇 搥 迦

梵語也此云生謂生來  
搥也男根不具也 搥丑皆切 攀攀呂員  
足不能行也 切 搥陟瓜切 搥搥責加切 搥手取物  
也 搥也搥七活切 搥兩指